



Republika e Kosovës • Republika Kosovo • Republic of Kosovo  
Institucioni i Avokatit të Popullit • Institucija Ombudsmana • Ombudsperson Institution

---

## AVOKATI I POPULLIT

### RAPORT

#### I

### MEKANIZMIT KOMBËTAR PËR PARANDALIMIN E TORTURËS

*lidhur me vizitën në Stacionin Policor në Pejë*

Drejtuar: Z. Gazmend Hoxha, drejtor i përgjithshëm  
Policia e Kosovës

Kopje: Z. Xhelal Sveçla, ministër në detyrë  
Ministria e Punëve të Brendshme

Z. Habit Hajredini, drejtor  
Zyra e Kryeministrit - Zyra për Qeverisje të Mirë

Prishtinë, më 10 qershor 2026

## Hyrje

Në pajtim me nenin 135, paragrafi 3, të Kushtetutës së Republikës së Kosovës, si dhe me nenin 17 të Ligjit nr. 05/L-019 për Avokatin e Popullit, Mekanizmi Kombëtar për Parandalimin e Torturës i Avokatit të Popullit (në vijim: MKP) vizitoi Stacionin Policor në Pejë.

Bazuar në nenin 17 të Ligjit nr. 05/L-019 për Avokatin e Popullit, MKP-ja mund t'i vizitojë në çdo kohë dhe pa paralajmërim të gjitha vendet ku mbahen personat e privuar nga liria, përfshirë stacionet policore, qendrat e paraburgimit, burgjet, vendet ku mbahen të huajt e privuar nga liria, institucionet psikiatrike dhe të kujdesit social.

## Qëllimi i vizitës

1. Qëllimi i vizitës në stacionin policor të lartpërmendur ishte për të vlerësuar se a janë respektuar tri të drejtat themelore të personave të arrestuar: E drejta për ta njoftuar anëtarin e familjes apo personin tjetër për faktin e arrestimit, sipas përzgjedhjes së tij; E drejta për avokat mbrojtës; E drejta për shërbime mjekësore si dhe kushtet e akomodimit në qendrën e ndalimit policor. Këto të drejta janë të përcaktuara dhe të garantuar me Kushtetutën e Republikës së Kosovës, me Ligjin nr. 04/L-076 për Policinë, me Kodin e Procedurës Penale, si dhe me standardet ndërkombëtare nga Komiteti Evropian për Parandalimin e Torturës. Po ashtu, qëllimi i vizitës në stacionin policor në fjalë, përveç vlerësimit të përgjithshëm të respektimit të të drejtave themelore të personave të arrestuar dhe të ndaluar, ishte edhe vlerësimi i çështjeve të tjera me rëndësi, si kushtet e punës në të cilat punojnë zyrtarët policorë, numri i stafit dhe faktorë të tjerë që ndikojnë drejtpërdrejt në kryerjen e detyrave dhe funksionimin e përditshëm të stacionit policor.

## Bashkëpunimi me MKP-në gjatë vizitës

2. Gjatë vizitës në stacionin e lartpërmendur, Policia e Kosovës i ofroi MKP-së bashkëpunim të plotë. Ekipi, pa vonesa, pati qasje në të gjitha hapësirat e stacionit policor. Ekipit iu siguruan të gjitha informatat e nevojshme për ta kryer detyrën dhe pati qasje në të gjitha dokumentet e kërkuara.

## Garancitë kundër keqtrajtimit

3. Të drejtat e personave të arrestuar nga Policia e Kosovës janë të përcaktuara dhe të garantuara me Kushtetutën e Republikës së Kosovës, me Kodin e Procedurës Penale, si dhe me instrumentet ndërkombëtare të përfshira në Kushtetutën e Republikës së Kosovës.
4. Komiteti Evropian për Parandalim të Torturës (KPT), në Raportin e 2-të të Përgjithshëm, i publikuar në vitin 1992, theksoi rëndësinë e tri të drejtave themelore të personave të arrestuar nga policia, të cilat janë: E drejta për ta njoftuar personin e tretë për arrestimin, sipas përzgjedhjes së tij/saj (anëtarin e familjes, mikun, konsullatën); E drejta për të pasur një avokat; E drejta për t'u ekzaminuar nga mjeku sipas dëshirës së tij (përveç ekzaminimit mjekësor nga një mjek i thirrur nga autoritetet policore)<sup>1</sup>.
5. Sipas KPT-së, këto të drejta janë garanci themelore kundër keqtrajtimit fizik dhe duhet të zbatohen që nga momenti i parë i privimit nga liria, pa marrë parasysh se si përcaktohet në kuadër të sistemit ligjor të një vendi.

<sup>1</sup> Shih: <https://rm.coe.int/16806cea2f/>

6. Legjislacioni në fuqi i Republikës së Kosovës këto të drejta themelore të personave të arrestuar dhe në mbajtje nga autoritetet policore i parasheh edhe në Kushtetutën e Republikës së Kosovës, në Kodin e Procedurës Penale, si dhe në Ligjin për Policinë.
7. Neni 13 i Kodit të Procedurës Penale përcakton se çdo person i privuar nga liria duhet të njoftohet menjëherë, në gjuhën të cilën ai/ajo e kupton, për të drejtën për ndihmë juridike, sipas dëshirës së tij, për të drejtën për t'i njoftuar anëtarët e familjes apo ndonjë person tjetër për faktin që është arrestuar dhe se këto të drejta aplikohen gjatë gjithë kohës së privimit nga liria.
8. Për sa i përket njoftimit për arrestim, neni 168 i Kodit të Procedurës Penale më tej përcakton se personi i arrestuar ka të drejtë ta njoftojë anëtarin e familjes apo personin tjetër, sipas përzgjedhjes së tij, për arrestimin dhe vendin e ndalimit menjëherë pas arrestimit; njoftimi i familjarit apo i personit tjetër lidhur me arrestimin mund të vonohet më së shumti deri në 24 orë kur prokurori i shtetit çmon se kjo kushtëzohet me nevoja të jashtëzakonshme për hetim të rastit. Kjo vonesë nuk aplikohet në rastin e personave të mitur.
9. Sipas Ligjit për Policinë<sup>2</sup>, e drejta për ta njoftuar familjen apo personin tjetër për arrestimin gjithashtu vlen edhe për personat të cilët janë në “ndalim të përkohshëm”, me qëllim të identifikimit ose për shkak të mbrojtjes së tyre dhe mbrojtjes së të tjerëve.
10. Sipas Kodit të Procedurës Penale, neni 13, paragrafi 2.3, neni 163, paragrafi 2, neni 164, paragrafi 5, ndaj personave të dyshuar përcakton se koha e ndalimit policor në qendrat e ndalimit nuk duhet të kalojë më shumë se dyzet e tetë orë (48) nga koha e arrestimit të tij, përveç rasteve kur gjyqtari i procedurës paraprake urdhëron ndryshe.
11. Sipas nenit 60 të Kodit të Drejtësisë për të Mitur, ndalimi i të miturit nuk mund të kalojë periudhën njëzet e katër orë (24). Pas kalimit të kësaj periudhe, i mituri duhet të lirohet, përveç nëse gjyqtari për të mitur cakton paraburgim<sup>3</sup>.
12. Për sa i përket së drejtës për avokat, personi i ndaluar/arrestuar, në bazë të nenit 166 të Kodit të Procedurës Penale, ka të drejtë për ndihmë të menjëhershme të mbrojtësit pas arrestimit të tij, sipas zgjedhjes së tij. Mirëpo, kur pësoni i arrestuar nuk angazhon mbrojtës, atij i sigurohet mbrojtësi me shpenzime publike. Po ashtu, personi i ndaluar mund të heqë dorë nga ndihma e mbrojtësit. Kjo e drejtë mund të hiqet në bazë të nenit 53, paragrafi 3, të Kodit të Procedurës Penale: *“Nga e drejta për të pasur mbrojtës mund të hiqet dorë, përveç në rastin e mbrojtjes së detyruar, nëse heqja dorë bëhet qartë dhe vullnetarisht pas informimit të plotë për të drejtën e tij në mbrojtje. Heqja dorë duhet bërë me shkrim dhe duhet nënshkruar nga i dyshuari apo i pandehuri dhe nga organi kompetent që e zbaton procedurën, ose mund të bëhet gojarisht në audio apo videokasetë, autenticiteti i të cilës verifikohet nga gjykata.”*
13. Ndërsa personat nën moshën tetëmbëdhjetë (18) vjeçare mund të heqin dorë nga e drejta për të angazhuar mbrojtës me pëlqimin e prindit, të kujdestarit ose të përfaqësuesit nga qendra për punë sociale, përveç rasteve të dhunës në familje, në të cilat është përfshirë prindi ose kujdestari, raste këto të cilat prindi ose kujdestari i tillë nuk mund të japin pëlqim për heqjen dorë nga kjo e drejtë.

<sup>2</sup> Ligji për Policinë, neni 20.

<sup>3</sup> Kodi i Drejtësisë për të Mitur, neni 60.

14. Lidhur me të drejtën për kontroll mjekësor të personave të arrestuar/ndaluar, neni 169 i Kodit të Procedurës Penale përcakton se personi i arrestuar/ndaluar ka të drejtë për kontroll mjekësor, sipas kërkesës së tij, të kontrollohet nga mjeku apo nga dentisti, sipas përzgjedhjes së tij. Po ashtu, kur personi i arrestuar tregon shenja të sëmundjes mendore, policia menjëherë mund të urdhërojë kontrollimin nga një psikiatër.
15. Ndërsa kur person i arrestuar është shtetas i huaj, sipas nenit 167 të Kodit të Procedurës Penale, ka të drejtë ta njoftojë dhe të komunikojë gojarisht apo me shkrim me ambasadën, me zyrën ndërlidhëse apo me misionin diplomatik të shtetit, shtetas i të cilit është ai, ose me përfaqësuesin e organizatës kompetente kur ai është refugjatë ose nën mbrojtjen e ndonjë organizate ndërkombëtare.

### **Gjendja infrastrukture dhe kushtet e punës në Stacionin Policor në Pejë**

16. Bazuar në Procedurat Standarde të Operimit (PSO), qendrat e ndalimit duhet të jenë në përputhshmëri me Rekomandimet e KPT-së, duke u bazuar në Konventën Kundër Torturës dhe Trajtimeve e Ndëshkimeve të tjera Mizore Jonjerëzore dhe Poshtëruese<sup>4</sup>.
17. MKP-ja vëren se KPT-ja në raportin e 2-të të Përgjithshëm, i publikuar më 13 prill 1992, në Strasburg, ka përcaktuar standardin lidhur me kushtet në qelitë ku mbahen të arrestuarit, i cili përcakton: *“Të gjitha qelitë në stacione policore duhet të jenë të madhësisë së arsyeshme për numrin e personave të akomoduar, duhet të kenë ndriçim adekuat (shembull, dritë e mjaftueshme për të lexuar, me përjashtim të periudhave të fjetjes) dhe ventilim dhe të jenë të pajisura me karrige të fiksuara ose tavolinë). Për më shumë, personat të cilët qëndrojnë në ndalim gjatë natës duhet t’u sigurohen çarçafë dhe batanije të pastra.”*<sup>5</sup>
18. Nga muaji shtator 2025, qendra e ndalimit në Stacionin Policor në Pejë nuk është funksionale, me ç’rast personat e ndaluar dërgohen në stacione të tjera policore. Në stacion gjithashtu mungon një dhomë adekuate për mbajtjen e personave të ndaluar deri në 6 orë.
19. Për sa i përket infrastrukturës, në stacion mungon një zyrë e veçantë për intervistim. Në objekt ndodhet një dhomë mike, e siguruar përmes donacionit nga KFOR-i italian.
20. Lidhur me pajisjet dhe logjistikën, u raportua mungesë e uniformave dhe furnizim jo i rregullt me to, si dhe mungesë e automjeteve për nevoja operative. Po ashtu, u evidentuan probleme me pajisjet e fotokopjimit, ku ka raste kur për periudha deri në 24 orë nuk funksionon asnjë aparat fotokopjimi.
21. Për sa u përket kushteve të punës, u raportua gjendje jo e kënaqshme e higjienës në objekt, ndërsa në disa raste zyrtarët policorë sigurojnë vetë mjetet higjienike.

### **Konstatimet e Avokatit të Popullit**

22. Avokati i Popullit konstaton se Qendra e Ndalimit në Stacionin Policor në Pejë nuk është funksionale që nga muaji shtator 2025, ndërsa në stacion mungon edhe dhoma adekuate për mbajtjen e personave të ndaluar deri në 6 orë, duke pamundësuar realizimin e

<sup>4</sup> Policia e Kosovës, Procedurat Standarde të Operimit për Qendrat e Ndalimit, DDO-04/0121/2016, pika 1.6, faqe 4.

<sup>5</sup> Komiteti Evropian për Parandalim të Torturës, Raporti i 2-të i Përgjithshëm, paragrafi 42. Për më shumë shih në: <https://rm.coe.int/1680696a3f>.

ndalimit në përputhje me Procedurat Standarde të Operimit (PSO) dhe standardet e KPT-së.

23. Avokati i Popullit konstaton se mungesa e një zyre të veçantë për intervistim paraqet mangësi infrastrukturore që ndikon në zhvillimin e procedurave policore në kushte të përshtatshme.
24. Avokati i Popullit konstaton se mungesa e uniformave, furnizimi jo i rregullt me to, mungesa e automjeteve operative, si dhe problemet me pajisjet e fotokopjimit ndikojnë në funksionimin efikas të punës dhe realizimin e detyrave operative dhe administrative.
25. Avokati i Popullit konstaton se gjendja jo e kënaqshme e higjienës dhe sigurimi i mjeteve higjienike nga vetë zyrtarët policorë tregojnë mungesë të mirëmbajtjes dhe furnizimit adekuat të stacionit me mjete bazike për punë.

Në bazë të të gjeturave dhe konstatimeve të arritura gjatë vizitës në stacionin policor të lartcekur, në pajtim me nenin 135, paragrafi 3, të Kushtetutës së Republikës së Kosovës, si dhe me nenin 17, paragrafi 7, të Ligjit nr. 05/L-019 për Avokatin e Popullit, Avokati i Popullit i

## REKOMANDON

### Drejtorisë së Përgjithshme të Policisë:

1. Të ndërmerren masat e nevojshme për funksionalizimin e Qendrës së Ndalimit në Stacionin Policor në Pejë, në përputhje me Procedurat Standarde të Operimit dhe standardet e Komitetit Evropian për Parandalim të Torturës.
2. Të sigurohet një dhomë adekuate për mbajtjen e personave të ndaluar deri në 6 orë, në përputhje me standardet ligjore dhe të drejtat e njeriut.
3. Të sigurohen hapësira adekuate për zhvillimin e intervistimeve dhe procedurave policore, në përputhje me standardet profesionale dhe me të drejtat e njeriut.
4. Të sigurohet furnizim i rregullt me uniforma për zyrtarët policorë.
5. Të sigurohen automjete të mjaftueshme për nevoja operative të stacionit policor.
6. Të sigurohen dhe mirëmbahen pajisje funksionale të punës, përfshirë pajisjet e fotokopjimit, me qëllim të garantimit të funksionimit efikas të stacionit policor.
7. Të përmirësohen kushtet e higjienës në objekt dhe të sigurohen në mënyrë të rregullt mjetet higjienike të nevojshme për zyrtarët policorë.

Në pajtim me nenin 132, paragrafi 3, të Kushtetutës së Republikës së Kosovës (“Çdo organ, institucion ose autoritet tjetër, që ushtron pushtet legjitim në Republikën e Kosovës, është i detyruar t’u përgjigjet kërkesave të Avokatit të Popullit dhe t’i paraqesë atij/asaj të gjitha dokumentet dhe informacionet e kërkuara në pajtim me ligj.”) dhe me nenin 28 të Ligjit nr. 05/L-019 për Avokatin e Popullit (“Autoritetet, të cilave Avokati i Popullit u ka drejtuar rekomandim, kërkesë ose propozim për ndërmarrjen e veprimeve konkrete, përfshirë edhe masat disiplinore, duhet të përgjigjen brenda afatit tridhjetë (30) ditor. Përgjigja duhet të

*përmbajë arsyet me shkrim për veprimet e ndërmarra lidhur me çështjen në fjalë.”), ju lutemi mirësisht të na informoni për veprimet e ndërmarra lidhur me çështjen në fjalë.*

Me nderime,

Naim Qelaj

Avokat i Popullit

